



Petrus Nannius Alcmarianus in Holandia natus & educatus est, anno circiter 1490. hic cum ob præclaram indolē literis operam daret, post varias hinc inde academias frequentatas Louanium uenit, & omnis generis disciplinis ac linguarū studijs incubuit. in ijs etiam adeo profecit, ut linguarū cognitione illis in locis nulli secūsus esset. Itaq; publicus professor Latinæ linguæ constituitur. eā pro sua eloquentia per multos annos continuauit, & ob multifariam eruditionem sibi magnum nomen comparauit. Ibi orationem Demosthenis de immunitate aduersus Leptinen, atq; Athenagoræ librum De resurrectione mortuorum ex Græco in

Latinum uertit. Præterea Athanasij opus, cum multis alijs Theologorum antiquissimorū monumentis, transtulit, & hoc modo rem literariam plurimum auxit. Tandem senio cōfectus Louanij 1555 obiit, & honestam sepulturam impetrauit. Id quod mihi Arnoldus Birckmānus doctissimus typographus Coloniensis de hoc Nannio pluribus significauit: qui etiam (pro sua humanitate) omnium illustrium uirorum Belgia, qui hodie aut superiori seculo in pretio fuerunt, ut patriæ prodesset, & meum institutum adiuuaret (quibusdam alijs uiris doctis præsentibus) cum Moguntia esset ordine cōmunicauit, anno 1565. Id quod hoc loco lectorem uelim esse admonitum. Anon.